

Inatsisartut suleriaasianni § 37, imm. 1 naapertorlugu, matumuuna Naalakkersuisunut imaattunik apeqquteqarpunga:

Naalakkersuisunut apeqqutit:

1. Avataani qaleralinniarnermi tulaassisussaatitaaneq tunisussaatitaanerlu pillugit 25%-imik appaasimaneq Naalakkersuisut uppersarsinnaanerlugu, Royal Greenland A/S-imi Kommune Qeqertalimmi Qasigiannguani Kangaatsiamilu pisassat annerpaartaannik nunami atortulersuutitalinnut tulaassinissamut pisussaaffeqarunnaarmat?
2. Avataani qaleralittassiissutit Royal Greenlandip tulaattagai pillugit Naalakkersuisut nassuiarsinnaanerlugu, uani nunami atortulersuutit umiarsualiviillu sorliit pisanik tigusaqartarnersut kisitsiviusullu eqqortut paasissutissiissutigalugit ilanngullugit (tonsit procentillu) illoqarfinni ataasiakkaani 2023-mi 2024-milu agguataarneqarsimasut kiisalu 2025-mi agguaaassinissamut naatsorsuutigineqartoq ilanngullugu?
3. Nunamut tulaassisussaatitaanerup annikillilerneqannginneranut naleqqiullugu Kommune Qeqertaliup avataani qaleralittassiissut qanoq angitigisoq ullumikkut tulaanneqartarpa?
4. Suliffissaqartitsiniarneq, suliaqarneq inuiaqatigiillu aningaasaqarneranut illoqarfinni pineqartuni tulaassisussaatitaanerup appartinneqarnerata kingunera pillugu Naalakkersuisut pineqartunut kingunerisassaannik naatsorsuusiorsinnaanerlutik?
5. Inatsisartut anguniagaannut sumiiffinni oqimaaqatigiissitsinissamut qeqqanilu eqiterussinerunngitsumik suliffissaqartitsiniarnermi, allanik suliffissarsinnaanermut qulakkeerinniffiunngitsuni pisortanit suliffeqarfiutaasumit nunami atortulersuutinut tulaassisussaatitaanerup appartinneqarnera illoqarfinni minnerni ingerlanneqartoq Naalakkersuisut naleqqussorinerlugu?

(Inatsisartunut ilaasortaq Jens NapātôK', Naleraq)

Tunngavilersuutit:

Avataani qaleralittassat tulaanneqartussaatitaasut 25%-imik appartinneqarnerat Qeqertalimmi suliffissaqartitsiniarnermi aningaasaqarnerullu ingerlanneqarneranut annertuumik allannguisussatut siulittuutigineqarsinnaavoq, uani pineqarlutik Qasigiannguani Kangaatsiamilu. Pisortanit namminersortitami suliffeqarfimmit Royal Greenlanditut ittunut



nunami atortulersuutitut nioqqutisiassanik tunioraanerup appartinneqarnera asuliinnaanngilaq – toqqaannartumimmi suliffeqarfinnut, ilaqutariinnut piffimmilu inuiaqatigiinnut malunnaatilimmik kinguneqarpoq.

Inatsisartut anguniagaattut oqaatigineqarsimasooq sumiiffikkaartumik oqimaaqatigiissitsinissaq qeqqanilu eqiteruffiunngitsumik ineriartortitsinissaq pillugu, imaluunniit naammassisaqarsinnaassutsip qaffatsinnissaa anguniarlugu eqiterussineq salliutinneqarsimanersoq ersarluppoq Naalakkersuisut aalajangiinnginnerminni kingunerisassaannik naatsorsuisimaneq naammaginangitsoq ingerlanneqarsimammat. Taamaattumik tamakkiisumik ammasumik pisariaqarpoq ingerlatsinissaq pisat sumut tulaanneqartarnersut qanorlu annertutigisut pineqarnersut paasissallugu, qanorlu Naalakkersuisut piginnittussaannermut akisussaaffimmik tigusiarnersut, illoqarfinni minnerni suliffissaqartitsiniarnermut aalajangiineq annaasaqarfiussappat.

Apeqqutit apeqqutilliissutigineqarput ersarissaqqullugu piffinni suliffissat pioreersut ilumut salliutinnersaat - imaluunniit nunani tamarmi sumiiffikkaartuni inuussutissarsiornermut toqqammavigineqartut nungusarneqarnerat Naalakkersuisut akuerineraat.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasooq aallaavigineqassaaq.